



Na osnovu člana 56. Zakona o organizaciji uprave u Federaciji Bosne i Hercegovine („Službene novine Federacije Bosne i Hercegovine“, broj: 35/05), člana 52. Zakona o izvršenju Budžeta Bosansko-podrinjskog kantona Goražde za 2025. godinu („Službene novine Bosansko-podrinjskog kantona Goražde“, broj: 1/25) i člana 4. Pravilnika o finansiranju projekata i aktivnosti udruženja boračkih populacija, a u skladu sa Programom utroška sredstava Ministarstva za boračka pitanja sa ekonomskog koda 614 300 – «Tekući transferi neprofitnim organizacijama», na koji je Vlada Bosansko-podrinjskog kantona Goražde dala saglasnost Odlukom broj: 03-11-277/25 od 17.02.2025.godine i Zaključka Vlade Bosansko-podrinjskog kantona Goražde broj: 03-11-317/25 od 20.02.2025.godine, ministar za boračka pitanja Bosansko-podrinjskog kantona Goražde **raspisuje:**

JAVNI POZIV

za dodjelu sredstava za osiguranje neometanog rada udruženja boračkih populacija
sa prostora Bosansko-podrinjskog kantona Goražde

I

Predmet Javnog poziva je dodjela sredstava iz Budžeta Ministarstva za boračka pitanja Bosansko-podrinjskog kantona Goražde za osiguranje neometanog rada udruženja boračkih populacija u skladu sa specifičnim ciljem iz alineje a) stav (2) tačka 3.2.1. Programa utroška sredstava sa ekonomskog koda 614 300 – „Tekući transferi neprofitnim organizacijama“ za 2025.godinu.

II

Pravo učešća u Javnom pozivu imaju boračka udruženja sa prostora Bosansko-podrinjskog kantona Goražde čije aktivnosti i rad iziskuju znatne materijalne troškove i/ili angažovanje stalno uposlenih lica (radni odnos ili drugi vid angažovanja shodno obimu poslova do visine minimalne bruto plate isplaćene u Federaciji BiH za posljednju godinu, prema posljednjem objavljenom podatku Federalnog zavoda za statistiku).

Posebni kriteriji za dodjelu sredstava su:

- Uloga i značaj udruženja za širu društvenu zajednicu;
- Broj stalno uposlenih za koje su izmireni svi doprinosi;
- Broj aktivnih članova udruženja;
- Afirmacija volonterskog rada i aktivizma građana;
- Uspješno realizirani projekti od strane Aplikanta, a koji se odnose na unaprijeđenje statusa pripadnika boračke populacije i zaštitu tekovina borbe za očuvanje Bosne i Hercegovine.

III

Postupak odobravanja sredstava po ovom Javnom pozivu sprovodit će se u skladu sa odredbama Zakona o dopunskim pravima branilaca i članova njihovih porodica u Bosansko-podrinjskom kantonu Goražde i podzakonskim aktima donesenim, uz saglasnost Vlade Bosansko-podrinjskog kantona Goražde, od strane Ministra za boračka pitanja.

Ministarstvo ne snosi nikakve troškove Aplikantima koji su nastali u postupku po ovom Javnom pozivu, te zadržava pravo da pojedini projektni prijedlog odbije, prihvati u cijelosti ili sufinansira dio odobrenih aktivnosti.

Nakon okončanja postupka i odobravanja sredstava od strane Vlade Bosansko-podrinjskog kantona Goražde, sa aplikantima kojima su odobrena sredstva, zaključit će se pojedinačni ugovori kojim će se definisati međusobna prava i obaveze u vezi dodjele sredstava.

IV

Aplikanti uz dokumentaciju iz tačke V ovog Javnog poziva, mogu aplicirati u vidu projekata, a isti obavezno sadrži: naziv projekta, opis problema/potreba, kratak opis projekta, ciljeve i ciljne grupe (krajnji korisnici) projekta, planirane aktivnosti i vremenski plan realizacije aktivnosti, očekivani rezultati, potreban broj osoba za realizaciju projekta, detaljno planiran budžet sa očekivanim prihodima i rashodima, očekivani rizici u realizaciji projekta i prethodna iskustva u realizaciji sličnih projekata.

Uz prijedloge projekata, obavezno se dostavlja sljedeća dokumentacija:

- a) rješenje o registraciji;
- b) uvjerenje iz Registra udruženja izdato u vrijeme podnošenja zahtjeva, izuzev iz Registra udruženja koje vodi Ministarstvo za pravosuđe upravu i radne odnose Bosansko-podrinjskog kantona Goražde, (koje nosilac budžetskih sredstava pribavlja po službenoj dužnosti);
- c) uvjerenje o poreskoj registraciji - identifikacioni broj;
- d) izvod iz važećeg Statuta, ovjeren od strane nadležnog organa, iz kojeg su vidljivi ciljevi i djelatnosti Aplikanta;
- e) izvještaj o urednom finansijskom poslovanju (bilans stanja i bilans uspjeha za prethodnu godinu, ovjeren od strane nadležnog organa);
- f) uvjerenje o izmirenim poreskim obavezama (original ili ovjerena fotokopija ne starija od 6 mjeseci);
- g) uvjerenje o izmirenim poreskim obavezama i doprinosima za zaposlenike (ukoliko ima zaposlenika, original ili ovjerena fotokopija ne starija od 6 mjeseci);
- h) narativni finansijski izvještaj o radu za prethodnu godinu usvojen od strane nadležnog organa Aplikanta;
- i) program rada i finansijski plan za godinu u kojoj se finansiranje traži;
- j) dokaz o aktivnom transakcijskom računu (potvrda banke ili ovjerena fotokopija ugovora) i
- k) drugu relevantnu dokumentaciju za evaluaciju projekta.

Dokumentaciju iz prethodnog stava, Aplikant dostavlja samo jednom u toku budžetske godine bez obzira na broj objavljenih javnih poziva od strane Ministarstva, osim u slučaju da su nastale promjene u podacima navedenim u prethodno dostavljenoj dokumentaciji.

Aplikanti koji nemaju uposlenih mogu dostaviti odgovarajuću izjavu ovjerenu kod nadležnog organa kojom potvrđuju da nemaju uposlenih i neizmirenih obaveza po osnovu direktnih poreza i/ili doprinosa ili obaveza prema zaposlenicima.

Aplikanti koji su registrovani u periodu manjem od četiri godine zaključno sa danom objavljivanja javnog poziva, ne mogu aplicirati po ovom javnom pozivu.

Aplikantima kojima su odobrena i doznačena sredstva u prethodnoj budžetskoj godini, a za ista nisu dostavili adekvatan izvještaj o utrošku sredstava sa odgovarajućom dokumentacijom, smatrat će se nepotpunim i kao takvi odbaciti.

Izuzetno od prethodnog stava, prijedlozi projekata smatrat će se potpunim ukoliko su dobili saglasnost za prenamjenu i produženje roka utroška odobrenih sredstava. U ovom slučaju, aplikant će dostaviti odgovarajuću ovjerenu izjavu.

V

Prijave sa potrebnom dokumentacijom, uz Obrazac prijave propisan od strane Ministarstva, podnosi se neposredno u zatvorenoj koverti na pisarnicu Kantona tokom radnih dana u periodu od 08⁰⁰ - 16⁰⁰ sati ili putem pošte na adresu 1. Slavne višegradske brigade broj 2a, 73000 Goražde. Vanjska strana koverta mora sadržavati puno ime i adresu aplikanta, puni naziv projekta sa naznakom „**NE OTVARAJ, PRIJAVA NA JAVNI POZIV**“.

Prijave koje ne ispunjavaju opće uslove, prijave kod kojih nisu realno planirana sredstva za predložene aktivnosti ili su aktivnosti neprimjerenog sadržaja, kao i neblagovremene, neuredne i nepotpune prijave neće se uzeti u razmatranje.

Ministarstvo nije dužno vratiti zaprimljenu dokumentaciju te ne snosi nikakvu odgovornost prema Aplikantima, u pogledu aktivnosti koje su poduzeli, radi apliciranja na određeni specifični cilj Javnog poziva.

Javni poziv ostaje otvoren do 17. marta 2025.godine, a rezultati javnog poziva objaviće se na oglasnoj ploči i službenoj internet stranici Vlade Bosansko-podrinjskog kantona Goražde.

Broj: 11-11-226/25
Goražde, 03.03.2025.godine



MINISTAR
mr. sc. Mensad Arnaut

DOSTAVITI:

1. Oglasna ploča Kantona;
2. Internet stranica Vlade i Ministarstva BPK Goražde i
3. Evidencija.